



## ***Komunikadu Imprensa***

**14 Marsu 2014**

### **Tribunál Distritál Baucau kondena pena efetiva tinan 1 prizaun ba arguidu kazu arma proibida**

Iha 12 Marsu 2014, Tribunál Distrital Baucau kondena arguidu SdCC ho pena efetiva tinan 1 prizaun tanba provadu komete krime arma proibida ka rai arma illegal ne'ebe previstu iha artigu 211 Kodigu Penal.

*“Hanesan Estadu de Direitu Demokratiku, sidadaun hot-hotu tenke obedese ba desizaun tribunál nian no hein katak desizaun ne'e bele transmite mensagem ba públiku katak tuir lei la iha fatin ba sidadaun sivíl ida atu rai no uza arma ka kualker atributu militar ruma ne'ebé iha potencia uza sala ba interese ne'ebé prejudika segurança nasional,”*dehan Diretór Ezekutivu, Luis de Oliveira Sampaio.

Ministériu Públiku akuza katak iha 06 Marsu 2014, equipa PNTL (Polísia Nasional Timor Leste) ne'ebé kompostu husi BOP (Batalion Ordem Públiku), no COE (Comando Operasaun Espesial) ezejuta Rezulusaun Parlamentu Nasionál Nú. 5/2014 hodi hapara movimentu grupu illegal sira ne'ebé hari'i iha 2010.

Iha loran ne'e, equipa halo operasaun ba iha bairo Watulele, Aldeia Lutumuto, Suco Trilolo, Distritu Baucau. Iha operasaun ne'e, PNTL kaptura arguidu ne'ebé involve iha grupu ida ho naran Forsa FBA (Forsa Baze Apoiu 1975). Aleinde ne'e, equipa mós prende katana, rama, granada, pistola rakitan, granada u'ut, kartu identifikasaun, bandeira FRETILIN, bandeira FALINTIL, bandeira FBA no farda militari Indonezia nian.

Ministériu Públiku akuza kontra artigu 211 (3) Kódigu Penal kona-ba arma proibida ho moldura penal prizaun too tinan 2 ka multa.

Iha julgamentu laran, arguidu uza direitu nonok. Hafoin tribunál rona testemuña na'in rua husi polísia investigasaun no intelejensia ne'ebé deklara katak iha momentu ne'ebá sira prende katana 1, rama 1, granada 1 (sei ativa), pistola rakitan 1 (iha kaixoti laran), granada u'ut, kartaun identifikasaun, bandeira FRETILIN, bandeira FALINTIL, bandeira FBA no farda militari Indonezia nian.

Julgamentu preside husi juis singulár Dr. Jose Goncalves, Ministériu Públiku reprezenta husi Dr. Domingos Barreto, arguidu hetan defeza husi Dr. Grigório de Lima husi Defensória Públika.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone:3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl